

# ԼԻԲԱՆԱՆԵԱՆ ՆՈՐՈՐԵԱՅ ԽՃԱՆԿԱՐԻՆ ՄԷՉ

Posted on July 26, 2013 by Keghart



Category: [Opinions](#)



Պարոյր Աղապաշեան, Պէյրուզ, 26 Յուլիս 2013

Լիբանանեան քաղաքական կեանքը կ'եռեւեփի:

Լիբանանեան ապահովական վիճակը կը սրի:

Լիբանանեան տնտեսական կացութիւնը կը տատանի:

Լիբանանեան համայնքային դրութիւնը կը խաթարուի:

Չզուանք ու գարշանք պատճառող տխուր իրականութիւններ, որոնք լիբանանցիին առօրեային մաս կը կազմեն, իրենց խոցելի եւ ողբալի հետեւանքներով:

Այնպիսի աննախընթաց վիճակ մը ստեղծուած է երկրին մէջ, ուր՝ քաղաքական կողմերը, յայտարարութիւններով եւ ելոյթներով, միայն զիրար կը նախատեն ու կը կշտամբեն, ամենէն բիրտ ու փողոցային լուտանքներով ու բառակոյտերով, մինչեւ իսկ զիրար բզքտելով ու հարուածելով, յատկապէս հեռատեսիլային բանավեճերու կամ հարցազրոյցներու ընթացքին:

Պարոյր Աղապաշեան, Պէյրուզ, 26 Յուլիս 2013

Լիբանանեան քաղաքական կեանքը կ'եռեւեփի:

Լիբանանեան ապահովական վիճակը կը սրի:

Լիբանանեան տնտեսական կացութիւնը կը տատանի:

Լիբանանեան համայնքային դրութիւնը կը խաթարուի:

Չզուանք ու գարշանք պատճառող տխուր իրականութիւններ, որոնք լիբանանցիին առօրեային մաս կը կազմեն, իրենց խոցելի եւ ողբալի հետեւանքներով:

Այնպիսի աննախընթաց վիճակ մը ստեղծուած է երկրին մէջ, ուր՝ քաղաքական կողմերը, յայտարարութիւններով եւ ելոյթներով, միայն զիրար կը նախատեն ու կը կշտամբեն, ամենէն բիրտ ու փողոցային լուտանքներով ու բառակոյտերով, մինչեւ իսկ զիրար բզքտելով ու հարուածելով, յատկապէս հեռատեսիլային բանավեճերու կամ հարցազրոյցներու ընթացքին:

Ո՛չ կրթութիւն, ո՛չ ալ քաղաքավարութիւն մնացած է:

Ո՛չ յարգանք, ո՛չ ալ ակնածանք մնացած է:

Ո՛չ ազնուութիւն, ո՛չ ալ անկեղծութիւն մնացած է:

Ո՛չ ընկերութիւն, ո՛չ ալ բարեկամութիւն մնացած է:

Ամեն մարդ դիմացինին երեսը նայելով, ընդոստ կը մտածէ, թէ անիկա քաղաքական ո՞ր հոսանքին կը պատկանի, ո՞ր համայնքէն է, ո՞ր շրջանը կ'ապրի, ո՞ր ղեկավարին կողմնակից է:

Հիւանդ է լիբանանցիին:

Աւելի ճիշդ՝ հիւանդացուցած են զինք:

Շատ ավելի ճիշդ՝ խենթացուցած են զինք:

Ինքն ալ կամովին թե բռնօրէն հիւանդացած ու խենթացած է:

Գիտէ՞ք ինչու, որովհետեւ, լիբանանցին կը դժգոհի այս խելագարութենէն, կը բորբոքի, կը բողոքէ, նոյնիսկ... կը կատողի, սակայն, նոյնհետայն կը հետեւի այս կամ այն հոսանքին, կը ծառայէ այս կամ այն պարագլուխին, կը գովերգէ այս կամ այն կողմը:

Այս կատակերգութիւն-ողբերգութիւնը կամ ողբերգութիւն-կատակերգութիւնը ամէն օր, ամէն առիթով եւ ամէն տեղ կը կրկնուի, այն աստիճան որ՝ ներհամայնքային ու միջհամայնքային բաժանումներ կը ստեղծուին, հակամարտութիւններ կ'առաջանան, ոճիրներ կը գործուին:

Քաղաքական կողմեր՝ մեծ թե փոքր, քաղաքական դէմքեր՝ արժանաւոր թե անարժան, քաղաքական նախաձեռնութիւններ՝ օգտակար թե անպէտք, երկիրը հասցուցած են այս ճահճային վիճակին, որովհետեւ ժխտականը արդէն ժխտական է, թունաւորելու աստիճան, մինչ դրականը միայն խօսք է, քաղաքական աստիճան ու գծուծ հաշիւներով: Ատենին գիտէինք թե՛ անգիր օրէնքով, Լիբանանի նախագահը կը նշանակուէր... դուրսէն, մնացեալը սոսկ... թատրոն էր, իսկ հիմա՞, իւրաքանչիւր շարժում, արարք, դիրք կամ հանգամանք կը տնօրինուի արտաքին աշխարհէն, առնուազն՝ անոր գիտակցութեամբ ու համաձայնութեամբ:

Այդ ո՞ր ժողովրդավարութեան մասին կը խօսուի, այն ժողովրդավարութեա՞ն, որ միակ հարստութիւնն էր Լիբանանին, իսկ այսօր ի՞նչ մնացած է անկէ, բացի ժողովուրդը եւ երկիրը... վառելու փորձերէն, պետական կառոյցներու թե այլ լծակներու ընդմէջէն: Իշխանաւորները իրենց աթոռներուն ու պաշտօններուն ծառայելու ու նուիրուելու փոխարէն, յանուն ժողովուրդին եւ երկրին բարօրութեան, ինչպէ՞ս կ'ըլլայ որ ոմանք կը յաւակնին խօսիլ համայնքային լեզուով ու համայնքային նշանակումներու շատագով դառնալ, համայնքային շահերը գերիվեր նկատել, համայնքային ծրագիրները նախադասել:

Լիբանանեան այս խճապատկերին մէջ, ո՞ր կը գտնուի լիբանանահայութիւնը, իր քաղաքական-ազգային թե հասարակական-ընկերային գործունեութեամբ:

Եթէ ըսենք թե՛ անտարբեր է, ճիշդ չէ:

Եթէ ըսենք թե՛ չէզոք է, ճիշդ չէ:

Եթէ ըսենք թե՛ կրաւորական է, ճիշդ չէ:

Եթէ ըսենք թե՛ դիտող է, ճիշդ չէ:

Բայց, կրնա՞նք ըսել թե՛ գոհ է:

Կրնա՞նք ըսել թե՛ համամիտ է:

Կրնա՞նք ըսել թե՛ համակերպող է:

Կրնա՞նք ըսել թե՛ հանդուրժող է:

Ազգային խայտաբղետ ղեկավարութիւնները կը գտնուի՞ն իրենց արժանի հորիզոնականներուն վրայ, իրենց ներկայութիւնը զգացնելով հո՞ն, ուր պէտք է, հո՞ն,

ուր կարիքը կը զգացուի:

Իսկ լիբանանեան այս խրող ու խրուող կացութեան մէջ, ո՞ր չկան մտահոգիչ ու տագնապեցուցիչ ելեւէջներ կամ խառնափնթոր իրավիճակներ, որոնք կը պահանջեն համապատասխան ճիշդ, խոհեմ ու լրջահայեաց կեցուածքներ:

Սակայն, ո՞վքեր եւ ինչպէ՞ս պիտի ցուցաբերեն այդ բոլորը, երբ՝  
- Խորհրդարանական մակարդակի վրայ, ականջալուր կ'ըլլանք խռպոտ ճայներու կամ ներկայութիւններու, որոնք իրենց գրաւած աթոռները կը շահարկեն, մոռնալով որ ատոնք իրենց սեփականութիւնը չեն, ոչ ալ կրնան զանոնք ծառայեցնել այլոց ծրագիրներուն, իսկ, ամենէն կարելորդ, չեն ուզեր հասկնալ, որ այդ աթոռները կը պատկանին լիբանանահայութեան այս կամ այն յարանուանութեան, ապա՝ ժողովրդային-զանգուածային խաւերուն, հոսկ՝ ազգային տարաբնոյթ կազմակերպութիւններուն:

- Ազգային գետնի վրայ, միասնութիւնն ու համագործակցութիւնը ո՞ր կը սկսին եւ ո՞ր կը վերջանան, այնքան ատեն որ լիբանանեան աւազախրելի քաղաքականութեան մէջ, ոմանք իրենց անձնական ետերով ու խակութիւններով կը գործեն, իսկ ուրիշներ իրենց հատուածական շահերով ու հաշիւներով, ապակողմորոշելով լիբանանահայութեան լայն հատուածներ:

- Ղեկավարական ծիրէն ներս, ձեռնհասներու, ողջմիտներու ու հեռատեսներու բացակայութիւնը խստօրէն զգալի ըլլալով, դուռ կը բանան բազմաթիւ ու բազմագոյն ձախաւերութիւններու եւ անճարակութիւններու:  
Այս մատնանշումները կամ յիշեցումները ի՞նչ կը նշանակեն, եթէ ոչ ինքնագլուխութեան կամ անգլուխութեան դրուածք մը, որ բնաւ ալ բարենիշ չի հանդիսանար լիբանանահայութեան շահերուն եւ իրաւունքներուն:

Սակայն, գիտակցող կա՞յ ազգային, իմա՞ լիբանանահայկական այս վտանգաւոր հիւանդկախութեան, մինչ լիբանանեան-շրջանային զարգացումներուն մէջ կը մխրճուի (կը մխրճեն) նաեւ լիբանանահայութիւնը, յատկապէս ոմանց տեղայնական-խորհրդարանական-քաղաքական... արկածախնդրութիւններով:  
Հասկցողներուն...:

